

Dezinformacije Press-a RS u vezi sa pitanjem električne energije u Brčkom



Press RS danas je objavio članak o cijeni električne energije u Brčkom koji namjerno navodi na pogrešan zaključak i u kojem su namjerno izostavljene tačne informacije koje je ovaj dnevni list juče dobio na sopstveni zahtjev. Urednicima je očigledno važnije da nepotrebno plaše stanovnike Brčkog nego da obavijeste građane o činjenicama.

Istina je da će cijena koju za električnu energiju plaća brčansko Javno preduzeće 'Komunalno' (JPK) biti povećana za narednih šest mjeseci od 1. jula 2010. godine ali još uvijek nije moguće tačno utvrditi za koliki iznos. Ovo je zbog toga što gđin Vladimir Dokić, predsjednik DERK-a, i dalje spriječava DERK da izvrši svoje zakonske obaveze da Brčkom izda dozvolu i da utvrdi tarife za brčanske potrošače. EP RS je već povećala cijenu električne energije koja se isporučuje Brčkom za prvih šest mjeseci ove godine za oko 7% u odnosu na prošlu godinu, ali JPK je bilo u mogućnosti da apsorbuje to povećanje cijene smanjivanjem iznosa finansijskih sredstava potrebnih za druge svrhe.

JPK će biti u mogućnosti da apsorbuje neke – ali ne sve – troškove povećane od 1. jula. Ovo znači da će biti potreban neki drugi izvor prihoda kako bi se podnijelo novo povećanje cijene, bilo da se radi o izvorima vlade i/ili potrošača. Supervizor za Distrikt Brčko, dr. Raffi Gregorian, i njegovo osoblje su od novembra prošle godine u stalnom kontaktu sa relevantnim vlastima Distrikta po ovom pitanju i biće preduzete odgovarajuće mjere za ublažavanje ove situacije u vezi sa cijenom. Supervizor će takođe upotrijebiti svoja ovlaštenja kako bi osigurao da lica i organi odgovorni za bilo

kakvo nepotrebno povećanje cijene za brčanske potrošače snose odgovornost i da Distrikt ostane finansijski cjelovit.

Problem oko električne energije nastao je za vrijeme mandata ranijih supervizora i prethodnih Vlada RS, ali je zajednička odgovornost sadašnje Vlade RS i supervizora da se postaraju da konačno riješe ovaj problem. RS i Distrikt Brčko potpisali su sporazum o ovom pitanju u septembru 2001. godine. Sve što je sada potrebno je nekoliko izmjena postojećeg Zakona RS o električnoj energiji, kako bi se osiguralo da stanovnici i potrošači Distrikta budu tretirani na isti način kao i svi drugi u BiH, i da postoji obaveza entitetskih Elektroprivreda, da u vidu javne usluge, vrše isporuku električne energije Brčkom u skladu sa zakonom BiH i direktivama EU.

Ukoliko se bude poštovao zakon, Brčko električnu energiju može dobijati bilo samo od EP RS ili samo od EP BiH ili od obje. Potpuna je neistina da je supervizor 'nametnuo odluku' da se Distrikt snabdijeva električnom energijom iz Federacije.

Supervizor je 15. juna obavijestio premijera RS da je usvajanje i objavljivanje prihvatljivih izmjena u Službenom glasniku, uz deblokadu rada DERK-a, jedino što stoji kao prepreka ispunjenju Konačne odluke i pokretanju procesa koji bi omogućio Upravnom odboru Vijeća za implementaciju mira da donese odluku o pravovremenom okončanju supervizije. U suprotnom, supervizija će se nastaviti sve dok ovaj uslov ne bude ispunjen.